

PHS henti jilid akhbar



Sebahagian daripada akhbar yang dijilidkan oleh Perpustakaan Hamzah Sendut (PHS) sebelum keputusan menghentikan proses menjilid akhbar dibuat pada Julai 2014. PHS 2 mempunyai arkib akhbar bercetak dari 1950an sehingga Disember 2013.

Oleh **NORSYAFIQAH ZAMAL ISHAK**

Perpustakaan Hamzah Sendut (PHS), Universiti Sains Malaysia henti jilid akhbar berikutan boleh mengakses bahan tersebut secara atas talian, selain menjimatkan kos dan ruang.

Menurut Ketua Bahagian Bahan-bahan Bersiri dan Dokumen, Sukmawati Muhamad, siswa-siswi boleh mengakses surat khabar melalui laman web PHS di bawah pangkalan data Bernama Library & Infolink Service (BLIS) yang juga dilanggan Kementerian Pendidikan Malaysia (KPM).

“PHS berhenti menjilidkan akhbar mulai Januari 2014 selepas meneliti faktor penyimpanan iaitu ruang dan kos menjilid. Namun PHS akan terus melanggan akhbar”, katanya.

“Jika proses penjilidan diteruskan, persoalan ruang untuk menyimpan akhbar tersebut akan timbul. Tambahan lagi, kita sudah mempunyai bahan yang sama secara atas talian hanya perlu ubah pembaca membaca secara atas talian”, tambahnya.

“Jika siswa-siswi ingin membuat rujukan surat khabar terdahulu, disarankan membuat rujukan melalui atas talian. Cara paparan

akhbar sama seperti membaca surat khabar secara cetak selain halaman tersebut boleh dicetak”, ujarnya.

“Walau bagaimanapun, siswa-siswi yang masih ingin membuat rujukan akhbar, PHS masih mengekalkan akhbar yang telah dijilid daripada 1950an hingga Disember 2013”, katanya.

“PHS juga bercadang untuk membuat mikro filem namun terdapat kekangan seperti hak cipta dan kos yang tertentu. Terdapat organisasi media tempatan yang telah membuat mikro filem untuk tujuan komersial maka universiti tidak boleh melakukannya”, jelasnya.

Jika proses penjilidan diteruskan, persoalan ruang untuk menyimpan akhbar tersebut akan timbul.

Bahagian Arkib Akhbar amal konsep terbuka

Perpustakaan Hamzah Sendut (PHS) 2 guna konsep terbuka di ruangan arkib akhbar untuk keselesaan pengguna. Siswa-siswi bebas membaca akhbar di ruangan yang disediakan tanpa perlu mendaftar.

Menurut Ketua Bahagian Bahan-Bahan Bersiri dan Dokumen, Sukmawati Muhamad, berbeza dengan konsep terdahulu iaitu *close access* diguna ketika Bahagian Arkib berada di PHS 1. Ruang yang lebih luas di PHS 2 membolehkan konsep terbuka dilakukan.

“Mengenai akhbar yang tidak tersusun dengan baik di rak dan terdapat juga akhbar yang diletakkan di atas meja adalah kerana proses penerimaan semula

bahan atau *retrievable* tidak sama seperti buku, pengguna bahan arkib bebas mencari bahan, membaca dan meletakkannya semula di tempatnya atau di atas meja”, katanya.

Jelasnya lagi, pengguna bahan arkib ini tidak ramai seperti peminjam buku, PHS memberi keselesaan kepada mereka dan membenarkan meletak akhbar di atas meja jika ingin menggunakannya lagi dalam masa yang terdekat tetapi tidak boleh meninggalkannya terbuka atau di atas lantai.

“Siswa-siswi yang menghadapi masalah untuk mencari akhbar boleh dapatkan bantuan staf PHS 2 kerana akhbar tidak mempunyai nombor siri, sebaliknya disusun mengikut tahun”, ujarnya.



Ruang kawasan membaca Bahagian Arkib Akhbar, Perpustakaan Hamzah Sendut (PHS) 2 membenarkan siswa-siswi meninggalkan akhbar yang ingin digunakan dalam masa tertentu di atas meja untuk keselesaan mereka.